

discontinué un peu trop long temps, mais ie m'y suis racoutumé du depuis, ce qui me faict croire qu'il n'est nullement necessaire à la conseruation de la vie, n'y* à la santé de l'homme, & qu'aysement s'en pourroit passer qui voudroit, il n'y auroit que de la peine au commencement & point à la fin.

224 Nostre pauvre cabane pouuoit auoir enuiron vingt pieds de longueur & dix ou douze de large, faicte en la forme d'un berceau de iardin, couuerte d'escorce partout, excepté au faiste où on auoit laissé une fente & ouuerture, d'un bout à l'autre de la cabane, pour fortir la fumée, estant acheuée de nous mesmes au mieux qu'il nous fut possible, nous fismes des cloisons de pieces de bois, separant nostre cabane en trois, dont la premiere partie du costé de la porte nous seruoit de chambre & de cuisine, pour faire tout ce qui estoit de nostre petit || mesnage & pour nostre repos de la nuit, que nous prenions contre la terre, sur une petite natte de ioncs, avec un billot de bois pour cheuet, & quelques busches que nous auions accommodées chacun deuant nos couches pour n'estre veus. Ce lieu nous seruoit aussi de salle, pour receuoir & entretenir les Sauvages, qui nous venoient voir iournellement.

La seconde chambre, qui estoit la plus petite estoit celle où nous ferrions nos ustencilles & petits emmeublemens. Et la troisieme, dans laquelle nous auions dressé un Autel avec des pieces de bois piquées en terre, nous seruoit de Chappelle, laquelle a esté la seconde qui se soit iamais bastie aux Hurons & pais circonuoisins où la sainte Messe se disoit tous les